

四庫全書

史部

欽定四庫全書

史部

江西通志卷九十五
六

詳校官監察御史_臣范衷

檢討_臣德生覆勘

總校官知縣_臣楊懋珩

校對官編修_臣盧遂

謄錄監生_臣孫鯤

欽定四庫全書

二
寫通志卷九十五

寫賢

君子之道或出或處或教天下或散或聚維彼賢聖
皇皇羈旅至於是邦觀其所主一時過化跡留夙古
亦有名流適彼樂土憑弔山川裒徊仰俯履綦陳跡
後先踵武地緣人重光輝流貯景行前賢用誌遺矩
作寓賢志

南昌府

周

澹臺滅明武城人字子羽狀貌甚惡欲事孔子孔子以
為材薄既已受業退而修行行不由徑非公事不見
卿大夫南游至江從弟子三百人設取子去就名施
乎諸侯史記

按子羽墓有三一在泰山南武城縣一在陳留襄
氏鄉一在豫章東湖上其中必有一誤宋程大昌

友教堂記云後世去古聖賢絕遠既無所事畏亦
無所有諛而爭獵以自夸耀於是有一事而彼此
互相同者使人慕尚如此無乃聖賢之澤久而不
泯也歟其亦民之秉彝無古今而好是懿德也歟
則其偽也乃其所以為可尚也況今之疑未必非
昔之信者歟今豫章不獨有祠墓兼有澹臺門用
仍舊志以弁寓言之首

慶忌吳公子也驟諫吳子曰不改必亡弗聽出居於艾

杜註艾吳邑豫章有艾縣

遂適楚聞越將伐吳冬請歸平越遂歸

欲除不忠者以說於越吳人殺之

左傳

漢

許劭字子將汝南平輿人少峻名節好人倫多所賞識
司空楊彪辟舉方正敦樸皆不就或勸劭仕對曰方
今小人道長王室將亂吾欲避地淮海以全老幼乃
南到廣陵徐州刺史陶謙禮之甚厚劭不自安告其
徒曰陶恭祖外慕聲名內非真正待我雖厚其勢必

薄不如去之遂復授揚州刺史劉繇于曲阿其後陶謙果捕諸寓士及孫策平吳邵與繇南奔豫章而卒

東漢書

晉

鄭袤字林叔滎陽開封人高祖衆漢大司農父泰揚州刺史有高名袤少孤早有識鑒荀攸見之曰鄭公業為不亡矣隨叔父渾避難江東時華歆為豫章太守渾往依之歆素與泰善撫養袤如己子年十七乃還

鄉里景元初拜光祿大夫封密陵侯

晉書

衛玠字叔寶河東安邑人年五歲風神秀異及長有盛名辟命屢至皆不就久之為太傅西閣祭酒拜太子洗馬兄璩為散騎侍郎內侍懷帝玠以天下大亂欲移家南行母曰我不能舍仲寶去也玠啟諭深至為門戶大計母涕泣從之臨別玠謂兄曰在三之義人之所重今可謂致身之日兄其勉之乃扶輿母轉至江夏玠妻先亡征南將軍山簡以女妻焉遂進豫章

是時王敦鎮豫章長史謝鯤先雅重玠相見欣然言
論彌日敦謂鯤曰昔王輔嗣吐金聲於中朝此子復
王振於江表微言之緒絕而復續不意永嘉之末復
聞正始之音何平叔若在當復絕倒玠嘗以人有不
及可以情恕非意相干可以理遣故終身不見喜愠
之色以王敦高爽不群而好居物上恐非忠臣求向
建鄴京師人士聞其姿容觀者如堵玠勞疾遂甚永
嘉六年卒時年二十七時人謂玠被看殺葬于南昌

謝鯤哭之慟人問曰子有何恤而致斯哀答曰棟梁折矣不覺哀耳咸和中改瑩於江寧同上

按郭子章云叔寶東晉名流一統志南昌流寓不載特為補之又云玠以永嘉六年五月六日至豫章其年六月二十日卒此則玠之南渡豫章四十五日豈暇至都下而亡乎且諸書皆云玠亡在豫章不云在都下也玠葬南昌城許徵君墓東

范宣字宣子陳留人年十歲能誦詩書嘗以刀傷手捧

手改客人問痛耶荅曰不足為痛但受全之體而致
毀傷不可處耳少尚隱遁加以好學手不釋卷以夜
繼日遂博綜衆書尤善三禮家至貧儉躬耕供養親
歿負土成墳廬於墓側太尉郗鑒命為主簿詔徵太
學博士散騎侍郎並不就家於豫章太守殷羨見宣
茅茨不完欲為改宅宣固辭之庾爰之以宣素貧厚
餉給之宣又不受宣雖閑居屢空常以誦讀為業譙
國戴逵等皆聞風宗仰自遠而至諷誦之聲有若齊

魯著禮易論難皆行於世 同上

唐

權準字士繇秦州略陽人祿山反天下聞其名爭取以
為屬永王舉兵勸士大夫準詭姓名以免元宗在蜀
聞之拜監察御史會母喪得風痺疾客洪州浙西節
度使顏真卿表為行軍司馬召拜起居舍人固辭嘗
曰吾潔身亂世以全吾志欲持是受名耶李季卿為
江淮黜陟使列其高行以著作郎召不就自中原亂

士人率渡江李華柳識韓洄王定皆仰率節與友善
卒年四十六洄等制服行哭詔贈祕書少監元和中

謚貞孝 豫章書

張寧字康叔洛陽人登進士授相王府司馬擢御史大
夫與陸贄韓愈友善德宗建中間陞國子監祭酒立
朝謇諤忤盧杞因棄官慕柳渾高風聞其隱於武寧
山遂訪渾遺蹤入紫鹿岡青牛洞慨然止曰紫鹿青
牛非方外人不可狎遂隱居於此 武寧縣志

曹松字夢徵舒州人學賈島為詩依建州李頻頻卒值
寇亂避地洪州西山唐昭宗光化四年禮部侍郎杜
德祥榜及第時年七十偕第者歛人王希羽亦年七
十餘及京兆劉象閩人柯崇鄭希顏皆年六十餘號
五老榜值上新平內難開放新進士喜甚詔選中有
孤寒者以名聞特敕授官故德祥以松等塞詔授校

書郎

姓源珠璣

南唐

陳陶字嵩伯世居嶺表以儒業名家陶挾策長安聲詩
歷象無不精究昇元中至南昌將詣建康聞宋齊邱
秉政自料與齊邱不合乃築室西山日以詩酒為事
會齊邱出鎮南昌陶志不屈而齊邱亦不為之薦

南

唐書

潘承祐字乾休晉安人仕吳為光州司法叅軍郡有大
獄群吏不直承祐固爭之不得因棄官歸閩嶺及王
氏據閩仕至大理少卿王延政鎮建州辟為度支判

官延政與福州構隙承祐極諫不納及延政僭號以
為吏部尚書而用其幸臣楊思恭為僕射承祐復爭
遂逐歸私第查文徽下建州以禮致之元宗以為衛
尉少卿遷鴻臚卿委以南方之事升降人物制置郡
縣多用其言薦陳誨林仁肇皆著功效老病乞骸骨
以禮部尚書致仕卒於洪州西山

同上

鍾禧字德林隨兄懷建家豫章屬辭敦行綽有時譽起
家藩府從事累登臺郎遷集賢殿學士後主時官勤

政殿學士宋師入金陵舊朝服坐於家兵及門舉族
死之十國春秋

宋

徐鉉字鼎臣揚州廣陵人十歲能屬文仕吳為校書郎
又仕南唐李昇父子試知制誥與宰相宋齊邱不協
貶泰州司戶掾俄復舊官環死事其子煜為禮部侍
郎歷尚書右丞宋師圍金陵遣鉉求緩兵時煜將朱
令贇將兵來援煜以鉉既行欲止令贇勿令東下鉉

曰此行未保必能濟難江南所恃者援兵爾要以社稷為重豈顧一介之使置之度外可也煜泣而遣之及至雖不能緩兵而入見辭歸禮遇皆與常時同及隨煜入覲太祖責之聲甚厲鉉對曰臣為江南大臣國亡罪當死不當問其他太祖歎曰忠臣也命為太子率更令淳化二年廬州女僧道安誣鉉姦私下吏道安坐不實抵罪鉉亦貶行軍司馬卒年七十六鉉無子門人鄭文寶護其喪至汴胡仲容歸其葬於南

昌之西山有文集三十卷

宋史

李黃建安人有清節仕江南李氏至諸司使宋初授官
不拜舉進士為衢州司理參軍以母在江南棄官歸
後其子虛已亦舉進士通判洪州迎黃至豫章樂其
山水曰此可以終吾身也遂於東湖築第以居并建
涵虛閣平生喜為詩與子壻晏殊唱酬有雅正集二

十卷行世

林志

李積中四會人元豐進士為御史敢直言元祐中司馬

光秉政罷新法積中力贊其議歷翰林直學士後蔡京為相黜元祐諸賢凡二百九十人積中與焉因徙家於洪州後裔安國大性大異大東俱知名

府志

邵成章欽宗朝內侍也建炎初上書論黃潛善汪伯彥誤國之罪帝怒除名南雄州編管侍御史馬伸言成章緣上書得罪今是何時以言為諱久之帝思成章忠直召赴行在其徒忌之謂於帝曰邵九伯來陛下無歡樂矣遂止之於洪州金人入洪聞其名訪求得

之謂之曰知公忠正能事吾主可坐享富貴成章不應脅以威亦不從遂釋之曰忠臣也吾不忍殺遺之

金帛而去

宋史

蘇雲卿廣漢人紹興間來豫章東湖結廬獨居待鄰曲有恩禮無良賤老稚皆愛敬之稱曰蘇翁身長七尺美鬚髯寡言笑布褐草履終歲不易披荆畚礫為圃藝植耘芟灌溉皆有法度蔬視他圃尤勝夜織屨堅韞過革舄人爭貿之少與張浚為布衣交浚為相馳

書函金幣屬豫章帥及漕曰余鄉人蘇雲卿管樂流
亞遁跡湖海有年矣近聞灌園東湖其高風偉節非
折簡能屈幸親造其廬必為我致之帥漕密物色曰
此獨有灌園蘇翁無雲卿也乃屏騎從更服為游士
入其園翁運鋤不顧進而揖之翁曰二客何從來耶
延入室土銚竹几地無纖塵案上有西漢書一冊二
客恍若自失默計以為蘇雲卿也遂叩其鄉里徐曰
廣漢客曰張德遠廣漢人翁當識之曰然客又問德

遠何如人曰賢人也第長於知君子短於知小人德有餘而才不足因問德遠今何官二客曰今朝廷起張公欲了此事翁曰此恐怕他未便了得在二客起而言曰張公令某等致公共濟大業因出書函金幣寘几上雲卿鼻間隱隱作聲若自咎歎者二客力請共載辭不可期以詰朝上謁旦遣使迎伺則扃戶閤然排闥入則書幣不啟家具如故而翁已遁竟不知所往矣帥漕以其狀復浚浚拊几歎息作箴以自責

曰雲卿風節高于傳霖予與之期共濟當今山潛水
杳邈焉莫尋弗力弗早予罪曷鍼同上

按劉子翬集有蘇雲卿傳宋史全載其文

宋自遜字謙父別號壺山居士金華人徙居南昌父子
兄弟皆能詩而謙父尤著當代名流皆敬愛之方虛
谷亟稱其殘年日易晚夾雪雨難消之句所著有詩

餘名山樵笛譜

安志

元

伍良臣元濟陽王甥嘗為撫州路經歷至正間避地於
進賢縣崇信鄉雖屬懿親恬然如布衣致力經籍從
事翰簡有詩若干卷題曰中流一壺又編通鑑纂要

補論見聞錄

府志

明

孔叔賢先聖五十七世孫父希魯官廬陵值元季道不
通歿於官叔賢留寓南昌之新吳家焉子二長斯誠
次斯聞皆立有成人行

梁混坦菴文集

謝復字一陽祁門人聞吳與弼倡道棄科舉業從之游身體力行務求自得居家孝友喪祭冠婚悉遵古禮或問學曰知行並進否則落記誦訓詁矣晚卜室西

山之麓學者稱西山先生

白志

伍伯遜汀州寧化人徙居南昌與弟伯暘伯達並力學敦信義同居數百口雍睦無間胡祭酒儼深嘉重之子恒受業吳聘君之門景泰間應賢良詔以親老辭

不赴終老子家

林志

蔣杰字美居其先普安人數傳至杰登萬歷己丑進士授戶部主事歷郎中抗疏請視朝極言晏安中隔之弊留中不報凡兩司錢穀御馬草場却中官五百金之賄力裁浮費歲省數千金尋司清原榷政潔己恤商遠近交德之比去建祠以祀擢知南雄府聽斷務先德教至有感泣罷訟者新郡學及宏道書院張曲江祠皆巍然輪奐月課士其中人文丕振陞粵西憲副以內艱歸服闋遂不復出遊覽名勝詩歌琴酒自

娛崇禎間子克顯任上高令解組為奉親避地之計
遂徙居豐城著九經選鈔十七史摘要邊畧議治河
議畧式穀堂集息園小草靜寄軒稿南遊日錄東遊
漫草紀遊小草武陵晤語普安續志年八十四卒所
著述俱經兵火散軼不存杰復工書兼採諸家法運
以已意人爭購而珍之

府志

國朝

陳上善字元水蘇州人博學好古以詩名海內兼工篆

隸僑居東湖去榆墩不數十武與萬時華陳宏緒徐
世溥相友善遭亂家破子身窮老徑竒卓犖之致一
發于詩所著有山居詩及適餘堂集施閏章集

瑞州府

宋

滕元發字達道東陽人以翰林侍讀學士言新法之害
貶居筠州或以為復有後命元發談笑自若曰天知
吾直上知吾忠吾何憂哉因上章自訟曰樂羊無功

謗書滿篋即墨何罪毀言日聞神宗覽之惻然即以

為湖州

宋史

蘇軾字子瞻眉山入嘉祐進士元豐二年謫授黃州團練副使七年移汝州安置省弟轍由九江至筠州先一夕洞山僧雲菴壽聖僧聰慧皆夢同轍迎五祖戒禪師其後軾至寓居廣福寺因額其堂曰同夢坡山及來蘇渡皆以軾得名其他題咏甚夥後仕至禮部尚書端明殿學士卒年六十六謚文忠

高安縣志

李顯忠字君錫初名世輔綏德軍青澗人孝宗隆興間
銳意恢復張浚遣顯忠出濠州趨靈壁復宿州紇石
烈志寧自睢陽引兵來攻顯忠竭力捍禦以邵宏淵
妬功阻撓師無鬪志潰於符離安置顯忠于筠州而
宏淵仍前建康都統制後朝廷知其故復顯忠太尉
奉祠

綱目續編

呂祖儉字子約祖謙之弟受業祖謙如諸生監明州倉
將上會祖謙卒欲終暮喪朝廷從之潘時經略廣東

欲辟為屬祖儉辭尋以鄭僑張杓羅點諸葛庭瑞薦
召除籍田令寧宗即位除太府丞時韓侂冑用事正
言李沐論罷右相趙汝愚祭酒李祥博士楊簡皆上
書訟汝愚沐皆劾罷之祖儉乃上封事曰李祥老成
篤實非有偏比蓋衆聽所共孚者今又斥逐臣恐自
是天下有當言之事必將相視以為戒鉗口結舌之
風一成而未易反是豈國家之利邪疏上東擔待罪
有旨呂祖儉朋比固上安置韶州至廬陵將趨嶺得

旨改吉州遇赦量移高安從弟祖泰徒步往省留月
餘語其友王深厚曰自吾兄之貶諸人箝口我雖無
位義必以言報國當少湏之今未敢以累吾兄也祖
儉沒貶所詔令歸葬所為文有大愚集

宋史

陳良祐字天與金華人登紹興進士厯起居中書舍人
左司諫言會子之弊願捐內帑以紓細民之急上慨
然從其言累遷吏部尚書朝議范成大使金請陵寢
地良祐論不當遣恐生邊釁忤旨貶瑞州居住尋移

信州 宋史宏簡錄

葉三省高宗時直龍圖閣憤秦檜誤國貽書趙鼎力排

和議之非檜恨之安置筠州

府志

余古不知何許人自稱布衣因光宗以災異詔群臣言

時政闕失古亦發憤上書極諫安置高安詣學教讀

同上

袁州府

晉

習鑿齒字彥威襄陽人為桓溫別駕晉末秦苻堅寇襄陽鑿齒避地於萬載山谷誦讀不輟後人名其山為

書堂山今分宜有習墓

安志

唐

陶沔竹溪六逸之一游萬載之東北村愛其山水遂居焉卒後鄉人立廟祀之今子孫所居之地號陶家坊

萬載縣志

柳希玘蘇州刺史父渾刺袁州有治聲朱泚反聞渾名

欲致之因榜掠其子希玳避居萬載之西江遂家焉
同上

湛賁宋長史茂之十二世孫家本毘陵後為宜春人初
為州吏其妻與彭伉之妻兄弟也伉貞元間擢進士
第親族往賀座皆名士獨飯賁於後園妻數之曰男
子不能自振勵顧困辱如此賁由是發憤力學一舉
進士上第伉聞賁舉方跨驢赤板橋驚墮地時人語
曰湛賁登第彭伉落驢

唐撫言

宋

陳瓘字瑩中沙縣人徽宗朝為左司諫遷右司員外權
給事中與曾布議論不合遺書論其過失布怒出知
泰州崇寧中除名竄袁州宣和間卒靖康初贈諫議
大夫賜謚忠肅

宋史宏簡錄

曹輔字載德南劍州人登進士第政和六年以通仕郎
歷祕書省正字上疏諫微行竄郴州六年移袁州居
一年召為校書郎歷官尚書左丞同知樞密院事謚

忠達 宜春縣志

吳師古宜興人舉進士紹興初胡銓上書阻和議乞斬

檜師古鍛水傳其書忤秦檜流袁州卒

宋史宏簡錄

知浹汾州人通春秋左傳好直言岳飛以賓禮待之飛

下大理獄浹上書聲其冤流袁州

明一統志

元

李稷字孟賓滕州人幼穎敏八歲能記誦經史從其父

官袁州師夏鎮又從官鉛山師方回孫鎮與回孫皆

名進士長於春秋稷兼得其傳泰定四年進士歷御

史丞加榮祿大夫

豫章書

鮑遇字千泗徽州人為西臺御史與歐陽原功友善元主以特們德爾輔導東宮上書劾其不可不納遂乞

休徙居萬載山中

萬載縣志

臨江府

晉

羅含字君章耒陽人含父綏嘗宰新淦新淦人楊羨後

為舍州將引舍為主簿舍傲然不顧羨招致不已辭
不獲而就焉及羨去職舍送之到縣新淦人以舊宰
之子咸致賂遺舍難辭而受之及歸悉封置而去由
是遠近推服

晉書

宋

徐世亨字嘉會開封人景祐間守臨有善政時詔州郡
立學世亨悉力營建以疾革遂家焉後累贈通議大

夫林志

劉次莊長沙人殿中侍御史博洽淹貫詞翰絕倫元祐中謫居新淦築室東山寺前俯瞰清流自謂有濠梁間趣因號戲魚翁時稱為高師今縣東有高師湖以

次莊得名

同上

王覲字明叟泰州如皋人第進士為右正言右司諫極論罷章惇蔡確韓縝張璪又劾竄呂惠卿紹聖初以寶文閣直學士知成都徙河陽貶少府少監又貶鼎州團練副使徽宗即位還故職知永興軍過闕留為

工部侍郎遷御史中丞改翰林學士日食四月朔帝
下詔責躬覲當制有惟德弗類未足以當天心之語
宰相去之乃力請外以龍圖閣學士知潤州徙海州
罷主管太平觀安置臨江軍卒紹興初追復龍圖閣

學士

宋史

方信孺字孚若興化軍人以父崧卿蔭補番禺尉韓侂
胄舉恢復之謀諸將僨軍朝廷尋悔金人亦厭兵遣
使講和召信孺赴都假朝奉郎充樞密院叅議通問

於金至要以五事信孺曰反俘歸幣可也縛送首謀
於古無之稱藩割地則非臣子所忍言至汴見左丞
相宗浩辨對不少詘授以報書還詔議所以復命衆
議還俘獲罪首謀增歲幣五馬遣信孺再往金人猶
執初議信孺固執不許宗浩計窮密與定約復命再
差抵汴宗浩變前說有誅戮禁錮語信孺不為動會
蜀兵取散關金人益疑信孺還言敵所欲五事其五
不敢言侂冑厲聲詰之信孺徐曰欲得太師頭耳侂

胄大怒奪三秩臨江軍居住

同上

許奇字彥國開封人以蔭補太醫院判建炎中孟太后

如虔奇扈駕至新喻遂家焉所著有黃農隱緒縣志

伍弼字國正寧化人紹興間知洪州時秦檜用事弼憤不能去力請致仕因占籍新喻之鳳池蕭詵為作歸

休記縣志

胡思誠字達孝澶州人寓居清江知安豐軍時群盜剽掠無禁思誠悉擒之淮西諸司上其事除知濠州自

號溶溪居士著有溶溪集若干卷

林志

余彥忠號清心忠襄安道六世孫由邵武訪親至新喻
遂家吟峰下恬淡樂善不慕榮名刻勸善錄行世謝
尚書諤序之嘗自閩攜匠開書市以利後學起鐵冶
以利公家喻之紙戶蓋創於彥忠云

縣志

趙孟濟字君用其先汴人寓居清江德祐中待次于家
郡檄攝衛城邑未幾元兵攻城孟濟與總統丁應明
閉譙門登樓椎鼓以張虛聲元兵越境去既而湖北

潰兵與西勤王兵城南相持孟濟慨然入陣撫諭兩軍感泣解散以功授清江令明年元兵大至城陷死之初丁應明與孟濟同里沒于陣孟濟白諸郡以聞官其二子

林志

任詔字子嚴蜀人自為令歷部使所至有政績後退居清江築園山岡扁曰盤園建堂曰高風有盤園集高

風錄

同上

元

富珠哩翀字子翬鄧之順陽人父居謙辟掾江西以家
自隨生翀贛江舟中金鳴者三人以為異翀稍長即
勤學父歿家漸落翀不恤而為學益力乃自順陽復
往江西從新喻蕭克翁學克翁夜夢大鳥止其所居
翼覆軒外舉家驚異出視之冲天而去明日翀至翀
始名思溫字伯和克翁為易今名字以夢故後復從
京兆蕭欒游其學益宏欒以女妻之大德十一年用
薦者授襄陽縣儒學教諭歷監察御史卒追封南陽

公謚文靖 豫章書

吉安府

吳

劉惇字子仁平原人遭亂避地客遊廬陵事孫輔以明天官達占數顯於南土每有水旱寇賊皆先時處期無不中者輔異焉以為軍師軍中咸散事之號曰神明建安中孫權在豫章時有星變以問惇惇曰災在丹陽權曰何如曰客勝主人到某日當得問是時邊

鴻作亂卒如惇言惇於諸術皆善尤明太乙皆能推演其事窮盡要妙著書百餘篇名儒刁元稱以為奇惇亦寶愛其術不以告人故世莫得而明也

三國吳志

唐

姚崇字元之陝西硤石人世傳崇父嘗宦蜀中崇從母留不去寄居永新縣北十里有臺曰聰明崇嘗舍其上其母墓今在縣治東舊學宮左崇歷官中書令謚

文獻

豫章書

牛僧孺字思黯涇州人祖仕唐為幕職自交廣至郴衡間為山寇所掠惟僧孺母子獲存遂棲姚崇故址母訓之學母終塋邑之西南禾川元和初第進士後官至中書侍郎敬宗立封奇章郡公卒謚文簡

同上

按郭子章云姚牛二公本傳並未序至吉州然一統志郡志俱詳載二母墓地不知何據考崇父懿為雋州都督永新非入蜀之路何以云崇母留不去僧孺貶循州長史徙衡汝此是僧孺事而志云

其祖仕唐自交廣至郴衡當必有誤今姑存之傳

疑可也

原跋

張德廣名欽青州人天復間授節度推官累功封開國

男監永新官滿因家之卒葬勝業鄉之金鰲山

縣志

尹濯汴州人仕唐廣平間為平南將軍累功封鄱陽侯

黃巢入廣詔改廣州刺史以靖其亂巢平留鎮洪州

居洗馬池朱溫代唐既據汴濯耻事二姓遂避地永

新家焉

府志

南唐

劉餗字漢臣為安福簿眷戀湖山之勝不忍去留家密

湖卒葬白馬峰

府志

孟賓于字國儀連州輔國鄉人天福中自湖湘越京洛

應舉遠人無援遂卜命于華山神琰有如一年乞一

琰凡六擲得吉天福九年登第果六舉後往江南官

至水部郎中致仕居吉州玉笥山自號羣玉峰叟

郡

閻雅談

張翊其先世為京兆人唐末翊父授任番禺屬劉隱將
據廣南棄官北還至潭衡間馬氏已有潭澧挈家奔
江南過廬陵禾川僦屋居焉翊與弟惟彬善讀書克
承先業高祖時徐知誥輔國政翊入廣陵以射策中
第授武騎尉南唐禪代擢虔州觀察判官西昌令假
道還廣陵里人榮之翊文辭婉麗禾山大舜二妃廟
碑廬陵紫陽觀碑新興佛閣碑文皆翊所撰

十國春秋

宋

劉功甫會稽人寶祐中為萬安令有惠政後即居于邑

之橫街府志

胡洪範環州人寄居吉水西城咸寧間星變以國學生

應詔上書詆賈似道專權誤國似道怒欲置之死丞

相江萬里疏稱其無罪得釋歸卒

吉水縣志

路植河南人紹興間為安福令後遂家於邑之湖溪

府志

元

姜天祐字孝祥四川重慶人以父蔭補吉安路都稅使

弟慶祥贅於仁壽鄉盧堯王氏遂家焉至正壬辰群盜蜂起與校書郎解子元大安羅啓南率衆拒寇遇敵敢勇與子元力戰而死太守立忠義祠以祀之

府志

李祁字一初茶陵人元末舉進士第二為遼陽儒學提舉元亡不復出寓居永新卒焉自號危行老人文章端雅有希蘧集若干卷

明一統志

明

單執禮順天宛平人洪武間以御史謫吉水丞卒寓縣

之南坊 吉水縣志

王應電字昭明崑山人受業於魏校篤好周禮謂周禮自宋以後各以己意更定然此皆諸儒之周禮也覃研十數載先求聖人之心溯斯禮之源次考天象之文原設官之意推五官離合之故見綱維統體之極成周禮傳詁數十卷嘉靖中家燬於兵流寓泰和以其書就正羅洪先洪先大服翰林陳積昌以師禮事之卒於泰和積昌為經紀其喪歸之崑山所著有經

傳正謚同文備考書法指要六義音切貫珠圖六義
相關圖等書行世

白志

王畿字汝中號龍溪浙江山陰人弱冠舉於鄉嘉靖癸
未下第歸受業王文成守仁丙戌試期不欲往守仁
曰吾非以一第為子榮也顧吾之學疑信者半子之
京師可以發明耳畿乃行中會試時當國者不說學
故不廷試而歸戊子守仁卒於南安畿奔喪至廣信
斬衰以畢葬事而後心喪壬辰授南京職方主事尋

以病歸後遷至武選郎中在林下四十年無日不講學嘗與鄒文莊守益羅文恭洪先會講青原考德問業一時稱盛焉

明儒學案

錢德洪字洪甫號緒山浙江餘姚人王守仁平濠歸越德洪與同邑范引年管州等數十人會於天中閣同稟學焉嘉靖五年成進士守仁征思田德洪與王畿承守越中書院七年奔守仁喪至貴溪羣弟子議喪服德洪曰吾夫子歿於道路無主喪者弟子不可以

無服然德洪有父母在麻衣布經弗敢有加焉築室
於塲以終心喪十一年始廷試出為蘇學教授歷遷
刑部員外郎穆宗朝進階朝列大夫致仕戊申與王
畿赴青原復古會後九年再至窮鄉遂谷田夫野老
皆知有會莫不敬業而安之

同上

撫州府

吳

丁奉字承淵廬江安豐人仕吳為冠軍將軍封都亭侯

計略過人能斷大事孫休時遷大將軍休薨奉與丞相濮陽興等迎立孫皓遷右大司馬左軍司有毀之者皓徙奉家於臨川

明一統志

晉

郭翻字長翔武昌人伯父訥廣州刺史父察安城太守翻少有志操辭州郡辟及賢良之舉家于臨川不交世事惟以漁釣射獵為娛與翟湯俱為庾亮所薦公車博士徵不就咸康末乘小船暫歸武昌省墳墓安

西將軍庾翼躬往造翻欲强起之翻曰人性各有所短焉可强逼翼又以其船小狹欲引就大船翻曰使君不以鄙賤而辱臨之此固野人之舟也翼俯屈入其舟中終日而去

晉書

南唐

賈崇少勇果俗謂之賈尉遲事烈祖積官至侍衛都虞候元宗嗣立擢神武統軍東都屯營使周師未及境盡焚其井邑棄壘而歸元宗責其奔潰之由且曰朝

野謂卿為賈尉遲朕甚賴卿一旦敵兵未至棄甲宵遁何面目至此耶崇叩首言朱元既叛大軍失律城孤氣奪無數旅以禦要害雖真尉遲亦無所施其勇惟陛下裁之以忤旨釋罪長流撫州

十國春秋

宋

韓駒字子蒼蜀陵陽人獻文論補將仕郎累官直學士院詔撰樂章坐蘇氏黨奉祠尋復應召歷知江州致

仕寓居臨川卒

林志

許忻字子禮拱州襄邑人寓臨川初擢第蔡京當國欲妻以女忻曰非偶也紹興間赴調趙鼎詢以世務條十弊以獻丐祠去尚書程瑤薦之召還時方議和忻極言不可後知邵州尊賢育才郡士嚮義及歸蕭然如昔閉戶讀書卒年五十六

府志

薛公采字元亮汝州葉縣人幼穎敏嘗問其外伯祖草堂先生曰已聞讀書之方未識行己之要草堂為作十戒十勉以示之嘗曰與其祿而蹈不測之機孰若

舍危就安而寧吾親乎遂不仕潛心聖道作詩訓諸
孫朱文公陸文安公皆為之跋呂成公贊其像曰今
衣冠古風節室如水衾似鐵佩所聞稚暨耄見汲公
無愧色卒葬招仙山

林志

張澂字達明舒州人官至尚書右丞建炎南渡嘗宰臨
川遂寓居焉著有淡巖文集

臨川縣志

李壁字季章眉山人歷仕至叅知政事有詩文士論以
其文章伯仲葉水心詩詞輩行陸放翁晚遷於撫創

我峰書院聚書藏於閣有臨汝閒書五十卷

府志

尹塤字致道和靖先生之後以恩補江西茶鹽幹官寓

臨川遂入籍焉仕至金州倅卒

同上

林文仲字次章祖公選本閩清人為瓊管安撫待次撫城因家焉登淳熙二年進士授常德府司法累仕至成都漕政卒子正嘉定進士

同上

孫覲晉陵人宣和六年以尚書員外郎叅詳貢舉被謫

道臨川寓居宜黃作興造遷學諸記

同上

元

虞汲本蜀仁壽人允文之後父珪知連州以文學知名汲仕宋為黃岡尉宋亡僑居臨川崇仁與吳澄為友澄稱其文清而醇家貧教授後以翰林院編修致仕

明一統志

章巴延以左丞致仕居臨川平章政事道通討賊江西請署行省左丞至則專任調遣設禦敵之計乘間出擊賊擣其營走之巴延之功為多未幾以疾卒

臨川

縣志

明

李貞字世貞山東蒲臺人初以才學舉任大名主簿改
樂安操執清慎上官重之委任磚窰于金雞城董役
過勤卒于工次貧不能還遂占籍于明賢鄉

林志

陳迪宣城人祖有賢以從征有功調撫州百戶因家焉
迪以薦為郡學教授入翰林累官至禮部尚書太子
太師北平兵起督兵江上還宣城文皇既入召問迪

抗節不屈與子鳳山等同日死
臨川縣志

建昌府

宋

張安石字伯起父侑金陵人康定中宰南豐卒於官貧
不克歸因家焉安石不治產業不畜妻子居無童僕
寄爨隣家與人接貌不苟親言不苟從舉太學進士
不第卒於京師曾文昭肇時在館閣致其骨歸里銘
其墓曰孔子不得中道而與之欲得不屑不潔之士

若伯起者其近是歟

豫章書

王羲叔字夏卿鄭州人官至侍郎家南城紹興中行卒為亂有撫定之功旰民德之建祠以祀其後裔華鏃

皆成進士

府志

吳潛字毅夫寧國人泰定十年進士第一紹定四年都城火疏論六事所言率驗知建康府兼行宮留守疏論保蜀之方護襄之策防江之算備海之宜甚難者三事端平初應詔復陳九事忤時相復起厯戶工吏

三部尚書兼知臨安言皆嘉納淳祐十一年拜右丞相兼樞密使開慶初乞骸未幾拜特進左丞相先是元兵渡江賈似道在漢陽御史饒應子請移之黃州黃雖下流實兵衝也似道以為潛欲殺已銜之令御史沈炎劾潛措置無方致全銜永桂皆破落職謫建

昌軍

宋史宏簡錄

陳蒙

闕

人咸淳間為太府寺主簿嘗入對極言似道

為相國政闕失後為淮東總領似道誣以貪污安置

于建昌軍籍錄其家

綱目續編

謝堯仁字夢得建寧人徙居南豐卓絕奇詭有志當世而骯髒不自達寓情詩酒著有鹿峰嶺菴集子驛字處厚亦能詩與舍人張孝祥友善

府志

元

王伯昭其先恒山人寓居南城學贍才雄聲稱藉甚大江之右未能或之先也

宋潛溪恒山精舍記

江西通志卷九十五

欽定四庫全書

江西通志卷九十六

寓賢

廣信府

唐

閻立本西安萬年人官中書令卜居武安山下讀書暖
水三山之左置南莊五都自太宗殂高宗立權移武
后立本舍宅為普寧寺施讀書處為智門寺舍南莊

為普圓禪院又築墓於普寧寺後委僧護守之

府志

陸羽字鴻漸一名疾字季疵復州竟陵人拜太子文學
徙太常寺太祝不就寓居信城北三里自號東岡子
性嗜茶環居多植茶因號茶山御史蕭瑜領洪州羽
自信州移至洪州王芝觀瑜喜與之唱和成帙權德
輿為之序

豫章書

吳勗字弱齡延陵人徙居貴溪好學善文嘗讀書溪南
五面峰下學者稱潛谷先生元和間以白衣召入拜

水曹郎年四十致仕有文集十卷柳宗元為序

明一

統志

俞稠歙州人唐時授睦州刺史過信州愛永豐之瑜山

遂徙家居其下

同上

宋

楊億字大年建州浦城人祖文逸南唐玉山令億將生
文逸夢一道士自稱懷玉山人來謁未幾億生七歲
能屬文對客談有老成風太宗聞其名詔送闕下試

詩賦五篇深加賞異即授秘書省正字歷官翰林學士兼史館脩撰判館事權景靈宮副使卒所著藉蒼武夸頴陰韓城退居汝陽蓬山冠輦等集內外制刀筆共一百九十四卷

宋史

詹復仁字仲仁崇安人景祐間登進士第累官中憲大夫浙江副使金人入汴遂奉親以歸徙居鉛山之永

平橋東崇義鄉

府志

葉幹字儁齊元符進士授大理寺評事本浙江處州籍

建炎初棄官隱弋陽縣南之遇春別號漁隱八子二十一孫壽九十四卒墓于河潭大理卿周三畏誌其

墓

同上

李彌大字似矩蘇州人崇寧進士履行端方為一時之傑累官至工部尚書後以顯謨閣學士致仕寓居于

信之懷玉山

宋史新編

馬永卿字大年揚州人大觀進士退居于鉛山南溪撰論語解十卷易拾遺二卷懶真子錄二十卷集十五

卷 府志

辛棄疾號稼軒歷城人紹興中金人南侵棄疾為義士
耿京奉表來通授天平軍掌書記未幾京被殺棄疾
遂留居鉛山後歷官樞密都承旨卒德祐初謚忠敏
明一統志

鄭望之字顯道彭城人徙居上饒少有文名靖康初再
使金營累官至吏部侍郎以徽猷閣直學士致仕弟
資之字深道亦居溪南仕至吏部侍郎

同上

韓元吉字無咎開封人維之子仕至吏部尚書龍圖閣
學士封潁川公嘗師尹焞得呂祖謙為壻師友淵源
為諸儒所推重徙居上饒所居之前有澗水號南澗
澗南有園築亭竹間號蒼筤與兄元隆俱登甲第卒
葬城東所著有愚慙錄周易繫辭等書子琥字仲止
號澗泉與趙奉泉同時有詩名稱二泉先生方虛谷
詩上饒有二泉指此

府志

晁謙之字恭祖澶州人渡江親族離散極力收恤因居

信州仕宋官敷文閣直學士卒葬鉛山鵝湖子孫因

家焉

明一統志

周聿字德元青州人徙居上饒紹興間召對陳經綸匡

濟策稱旨累官刑戶部侍郎所著有春秋大義易說

等書

同上

趙不迂字留臣嘗創書樓于上饒兄不遜字茂嘉後改名不過登進士第為清湘令嘗立兼濟倉于鉛山天

王寺

府志

尹穡字少稷兗州人博學有文登孝宗朝進士累官殿
中侍御史後遷至右諫議大夫紹興間僑居懷玉山
以方名齋徙上饒溪南之太霞宮開軒種竹曾文清
以友直名之

林志

劉進行浙江西安人乾道間官于饒後解官過信州遂
卜居於永豐之塘墀

永豐縣志

王洋字元渤東牟人仕至起居舍人僑居城之南池與

曾文清幾嘗相倡和

府志

周陸字仲固仕至湖南轉運判官徙居上饒扁所居曰

尚論東萊呂舍人有詩

同上

趙暘字義若鄭州人世居東里直龍圖閣以提點坑冶

鑄錢行提舉江州太平觀來居信州玉山智門寺時

左丞相呂忠穆公頤浩以書抵信守連南夫曰趙義

若父子皆士林宿望治封有賢人君子可厚加禮待

會義若作亭施舜顯因摘君子字以名之

同上

徐兢字明叔南唐騎省都尉鉉之裔仕至刑部郎中善

書畫人物瀟灑有園在弋陽縣王洋為賦真意堂詩

曾文清幾為賦蓮榭詩

同上

王傳字巖起蓬萊人嘗居上饒赴淮東提舉呂東萊有

贈行詩

林志

宋授字傳道號易齋世居青社徙信州後令豐城知永

康權發遣柳州俱有政績

府志

錢時字子是淳安人幼奇偉不群讀書不為世儒之習

以易冠漕司既而絕意科舉究明理學江東提刑袁

甫作象山書院招主講席學者興起政事多所裨益
著有周易釋傳尚書演義學詩管見春秋大旨四書
管見兩漢筆記蜀阜集冠昏記百行冠冕集

宋史

賈逸祖字元放邯鄲人好古博學寓居鉛山天王寺有
半隱齋陸務觀為之記卒葬東里趙蕃題之曰有宋
詩人賈元放墓

府志

元

圖烈圖字彥誠蒙古人父揭納新字嘉琿累功封忠武

侯祥興間鎮信州路得一識云水打巷村園永豐出
狀元遂家於永之進賢坊生圖烈圖登至順庚午年

蒙古榜進士第一授南臺御史

林志

馮廣字原正上世開化人父曾應任永豐教諭廣隨任

愛其山水靈秀因卜居於學宮之南

府志

明

徐夢麟懷遠人父良弼洪武間任貴溪令歿于官夢麟
遂占籍貴溪領永樂戊子科鄉薦官鹽課司提舉府

志

饒州府

周

吳申夫差六世孫長沙王芮父事楚考烈王以諫封春
申君謫居番陽相傳生芮時五色雲見今餘干縣有

五彩山

林志

晉

郭璞字景純河東聞喜人少受郭公青囊書九卷遂洞

五行天文卜筮之術元帝時為著作佐郎王敦謀逆
被誅時年四十九追贈宏農太守嘗寓鄱陽縣東一
百十里有郭璞山譔有洞林京費諸家要最新林卜
韻注釋爾雅三蒼方言穆天子傳山海經等書

府志

唐

歐陽詢潭州人唐太宗時拜太子率更令有一帖云年
二十餘至鄱陽縣喜其地沃土平衆士往往湊聚僑

寓甚久

明一統志

劉長卿字文房河間人開元進士至德中為監察御史
以檢校祠部員外郎為轉運使判官知淮南鄂岳轉
運留後鄂岳觀察使吳仲孺誣奏貶潘州南邑尉有
為之辨者除睦州司馬終隨州刺史集十卷內有餘
千夜宴歸弋陽山居登餘干古縣城與諸姪宴餘干
後溪同姜濬題裴式微餘干東齋負謫後登干越亭

諸詩

府志

盧綸字允言河中蒲人避天寶亂客鄱陽大歷初數舉

進士不第元載取綸文以進補閬鄉尉累遷監察御史輒稱疾去坐與王縉善久不調渾瑊鎮河中辟元帥判官累遷檢校戶部郎中嘗朝京師是時舅韋渠牟得幸德宗表其才名見禁中有所作輒使賡和異日問渠牟盧綸李益何在答曰綸從渾瑊在河中驛召之會卒

唐書

宋

葉似珪歙人皇祐間由文學舉歷官戶部郎以詩餞唐

介有一封遠謫君恩重萬里遙瞻玉殿寒之句忤執政意黜尹建陽再黜為德興丞樂其風土之淳遂家

焉

表君宏西江詩話

顧臨字子敦會稽人通經學長於訓詁皇祐中舉說書科為國子監直講遷館閣校勘同知禮院熙寧初神宗以臨喜論兵詔編武經要略出權湖南轉運判官提舉常平議事戾執政意罷歸元祐二年擢給事中拜天章閣待制河北都轉運使歷刑兵吏三部侍郎

兼侍讀為翰林學士紹聖初以龍圖閣學士知定州徙應天河南府忌者誣以他事斥饒州居住卒

宋史

蘇昞字季明武功人素性純茂強學篤志從張載學最久後見二程復師事以卒其業元祐末呂大中以布衣薦為太常博士坐元符中上書言事入邪籍編管饒州卒

宋史宏簡錄

汪廷直字從正婺源人政和二年登第進屯田員外郎未拜命卒寓居樂安龍亭尚書程瑀表其墓

府志

辛次膺字起季萊州人幼孤從母依外氏王聖美于丹徒俊慧力學日誦千言甫冠登政和二年進士第歷官為單父丞值山東亂舉室南渡寓居浮梁縣之最

高山

同上

鄭戩其先大梁人父肇戶部侍郎從高宗南渡徙居金陵戩官饒州通判因家焉明江淮幕府叅贊倫號環谷野人者戩七世孫也

天台林右集

薛仁輔字汝弼河東人紹興間官大理少卿時秦檜忌

岳飛坐以逼撓不奉詔下獄獄成仁輔不署奏牘且明飛無罪檜怒諷御史劾之編管遇赦量移饒州因

卜樂平之安巷居之今薛家塘即其遺址

林志

朱熹字仲晦新安人過餘干訪趙汝愚汝愚遣子崇憲師事之汝愚卒又弔焉居東山註離騷後即其所建書院又嘗讀書于浮梁之洞靈巖及德興之銀峰書

院雙溪清勝堂

府志

趙磻老字渭師東平人從范石湖使金虞丞相亦薦之

擢同知臨安坐殿司招兵事謫饒州遂家焉歷官工部侍郎撰拙庵雜著三十卷外集四卷

府志

元

張翥字仲舉晉寧人其父為吏從征江南調饒州安仁縣典史翥少時豪放不羈好蹴鞠喜音樂父以為憂翥一日翻然易業閉門讀書受業於李存存家安仁江東大儒也翥從之游道德性命之說多所研究至元末傳巖薦為國子助教尋退居淮東會朝廷修遼

金宋三史起為翰林國史編修官史成歷遷河南行省平章政事翰林院學士承旨致仕卒

元史

明

吳璋字廷用蘇州吳江人年十一喪父依母陸氏以居永樂間詔選天下節婦之賢者籍送內宮教刺繡陸以年例當行宣德間靖王出之封國韶州後改饒州陸皆從璋棄家往來二藩間屢啟求見不允母子不相知者二十五年璋哀痛誓必見母正統十二年冒

死求見嗣封康王憐而許之入見母而母已病篤不能言矣璋徬徨無計焚香籲天剖股作糜母啖之遂醒母子抱持以泣王聞而益閔焉召賜金帛獎諭而遣之璋遂奉母去饒卒于路匍匐扶櫬歸葬先墓一時士大夫哀其志作吳孝子傳

府志

潘一諤字茹虛福建惠安人萬歷辛卯鄉薦官淮藩長史勤學好問即居宅為講學之所名里仁社故藩涵玉創菁莪書院以延禮之寓饒二十餘年卒於官年

七十二著有日錄講義

同上

南康府

漢

巖下老人不知何許人亦不詳其姓字武帝南巡狩過
彭蠡詔舉逸民時老人龐眉皓髮處于巖下左右強
以應詔老人曰堯仁如天孤雲自飛一水一石臣之
樂也帝曰卿不願仕乎曰簪纓縉笏束身王朝其如
舊山谿之雲何帝嘉其志禮而遣之

林志

隋

虞綽字士裕餘姚人煬帝時為學士父經宰建昌因家

焉

府志

唐

司馬宅相字元陽河南人齊愍王之後隋召為學士唐

遷太子洗馬子悌擢進士惇歷山陰令亦嘗僑居於

此

同上

黃鳳麟其先江夏人徙家建昌好學能文以德行稱舉

進士累遷侍御史比部員外郎著有文集十卷

明一

統志

李涉字清之洛陽人與弟渤偕隱廬山白鹿洞涉憲宗

時為太子通事舍人歷官博士渤後徙少室山寶歷

中官江州刺史

白鹿洞志

陸羽字鴻漸景陵人常夢遊廬山後抵山果如所見忻

然曰今非夢矣素嗜茶著茶經嘗品諸水以谷簾泉

為第一今三峡橋之陸羽泉乃遺跡也

同上

按李涉兄弟及陸羽前志不載今補入

劉軻徐之沛縣人天寶之亂隱居廬山萬杉寺與隱士
茅君游元和末登進士官殿中侍御史史館修撰終
洛州刺史著有翼孟泰龍雜文等書

豫章書

楊於陵字達夫本太尉震之後年始六歲間關至江右
長有奇志十八擢進士節度使韓滉以女妻之滉居
宰相於陵避親退廬建昌以文書自娛穆宗朝官終
戶部尚書封宏農郡公以左僕射致仕卒年七十八

謚貞孝 新唐書

符載字厚之蜀人有奇才隱居廬山五老峰下聚書萬
卷不為章句學貞元中李巽觀察江西薦其才授奉
禮郎為南昌軍副使繼辟西川韋臯掌書記澤潞郝
士美叅謀歷協律郎監察御史元和中段文昌志其
墓 豫章書

元集虛河南人貞元元和間避地來居廬山相辭澗白
居易訪之題其亭 廬山志

楊衡元和中詩人隱居廬山人有竊衡詩而登第者後
衡及第見其人怒曰一一鶴聲飛上天之句尚在耶
其人遜謝曰此句知兄甚惜不敢竊之衡莞爾曰猶
可恕也

唐詩紀事

胡份

豫章書
作玠

不知何許人嘗隱廬山苦吟工詩與李騰

友善騰廉問江西弓旌不至

同上

何乾曜不知何許人仕為侍郎後挂冠隱廬山稱匡麓

道人卒葬鶴鳴峰之遷鶯谷

廬山志

徐凝睦州人元和中官至侍郎常居廬山題咏甚多同

上

五代

鄭元素華原人少習詩禮避亂南遊隱居廬山青牛谷

高卧四十餘年採薇食蕨絃歌自若構椽剪茅于舍

後會集古書至千餘卷

南唐書

史虛白字畏名山東人南游廬山以詩酒自娛元宗即位韓熙載薦之召見問為治之理虛白曰臣草野之

人漁釣而已邦國大計不敢預知因醉溺於殿陛元
宗曰真處士也賜田遣還

南唐書

伍喬廬江人性嗜學以淮人無出已右者遂渡江居廬
山國學一夕見人掌自牖隙入署讀易二字忽不見
喬大嘆異輒取易讀之探索精微越數年應進士舉
及試畫八卦賦霽後望鍾山詩榜出喬中第一仕至
考功員外郎卒有集一卷行世

十國春秋

陳旼閩人性沉澹志操古朴而不苟于仕進一卧廬山

三十年學者多師事焉元宗以幣聘之布裘鹿鞞進
止閑肆因獻景陽臺懷古詩元宗稱善欲授以官貺
辭不受賜粟帛遣歸舊隱卒年七十

南唐書

江為其先宋州人避亂建陽遂為建陽人遊廬山白鹿
洞師事處士陳貺居二十年有風人之體時金陵初
復唐制以進士取人為有題白鹿寺詩云吟登蕭寺
旃檀閣醉倚王家玳瑁筵元宗南遷駐于寺見其詩
稱善久之為由是肆傲自謂俯拾青紫乃詣金陵求

舉屢黜於有司欲束書亡越會同謀者上變按得其狀伏罪

同上

孟貫字一之建安人少好學嘗游廬山卜居其下以禮義文章節儉為當時師範人稱孟夫子仕周為大夫

林志

宋

楊徽之字仲猷建州浦城人南唐時讀書廬山白鹿洞後仕宋為諫議大夫遷翰林學士拜禮部侍郎善吟

咏太宗嘗選其詩十聯書於御屏故梁周翰詩云誰似金華楊處士十聯詩在御屏間景祐二年贈太子

太師謚文莊祀白鹿洞

白鹿洞志

蒯鰲宣城人家貧好學讀書白鹿洞為學精敏以文章

稱太平興國五年進士官至殿中丞歸隱廬山與諸

葛濤盧降號廬山二友

同上

馮京字當世其先自河朔徙鄂有奇志因父調南康守與兄元隨侍至幽邃菴愛其幽絕僧仁監留止讀書

未幾擢第今幽邃菴古松乃京手植也廬山紀事

明起不知何許人初為白鹿洞主掌教授學徒數百人時知江州周述上言學徒甚盛請賜九經使之肄習

後遷蔡州褒信縣簿

林志

蘇庠字養直丹陽人喜賦咏精翰墨卜築廬山以琴書自娛與脩水李彭齊名世稱蘇李養直父伯固從東坡遊養直屬玉雙飛水滿塘詞見賞於坡稱為吾家

養直廬山紀事

崔嘉彥字子虛少有大志壯歲避地巴東三峽間道下
吳越曾以耕戰策干故相趙忠簡會去相不果行自
是絕迹匡山得西原菴故址築室居焉耕田種藥以
自給年逾七十神明不衰

朱子集

林擇之字用中閩人從朱子遊最久朱子守南康擇之

來講學於白鹿洞

白鹿洞志

薛溉右補闕登之後號書倉為南海書記秩滿入廬山
築室居之扁曰薛處士山堂後起為諫議大夫未幾

復歸山題舊隱壁曰重来閒院靜喜對故山青時服

其文雅

廬山紀事

周紫芝字少隱宣城人家貧力學年六十一始以廷對
第三歷右司員外郎出知興國軍秩滿丐祠隱廬山

終焉

興國志

謝之良字子基開封人避兵廬山慕周朱之風遂家焉
事母克孝篤於友愛早領鄉貢以子登科遂棄舉業
專心理學號後巖處士官至承議郎致仕賜緋魚袋

累贈太師加封周國公著有綱常類監傳世

林志

九江府

漢

司馬遷龍門人太史公談之子也耕牧河山之陽十歲誦古文二十而南遊登廬山觀禹疏九江

史記

晉

高悝廣陵人少孤事母以孝聞年十三值歲饑悝菜蔬不饜每致甘肥于母撫幼弟以友愛稱寓居江州刺

史華軼辟為西曹書佐及軼敗惛藏匿軼子經年會赦乃出元帝嘉而有之以為叅軍至丹陽尹光祿大

夫封建昌伯

晉書

劉澄之字仲思彭城人漢楚元王之後妙善莊老旁通百氏初為府叅軍性好佛理乃之廬山自託遠公遂于西林澗北別立禪坊養志安貧精研元理劉裕旌其號曰遺民義熙六年卒

豫章書

宋

宗炳字少文南陽涅陽人性至孝居喪過禮為鄉里所稱刺史殷仲堪桓元並辟主簿舉秀才不就宋高祖辟為主簿不起問其故荅曰棲邱隱谷三十餘年高祖善其對妙善琴書精于言理每遊山水往輒忘歸乃下入廬山就釋慧遠考尋文義兄臧為南平太守逼與俱還乃於江陵三湖立宅凡所遊履皆圖之于室謂人曰撫琴動操欲令衆山皆響元嘉二十四年卒時年六十九

南史

周邵字子南與南陽翟湯隱於廬山庾亮臨江州聞翟
周之風束帶躡履而詣焉邵聞庾至轉避之亮復密
往值邵彈鳥於林因前與語還便云此人可起即拔
為鎮蠻護軍西陽太守其集載與邵書西陽一郡戶
口差實非履道真純何以鎮其流遁詢之朝野僉曰
足下今具上表請足下臨之無讓尋陽記
齊

宗測字敬微少文之孫少靜退不樂人間永明三年詔

徵太子舍人不就欲遊名山乃寫祖少文所作向子
平圖于壁上長子賓宦在都知父此旨便求祿還為
南郡丞付以家事遂往廬山止祖少文舊宅魚復侯
子響為江州厚遣贈遺測曰少有狂疾尋山採藥遠
來至此量腹而進松朮度形而衣薜蘿淡然已足豈
容當此橫施建武二年徵為司徒主簿不就卒

南史

梁

劉慧斐字宣文彭城人父元直淮南太守慧斐少博學

能屬文起家梁安成王法曹行叅軍嘗還都塗經尋陽游於匡山遇處士張孝秀相得甚歡遂有終焉之志因不仕居東林寺又於山北構園一所號曰離垢園人稱離垢先生

豫章書

張孝秀字文逸南陽人徙居尋陽為建安王別駕棄官入廬山隱居東林寺側孝秀性通率不好浮華嘗冠縠皮巾躡蒲履手執并閭皮麈尾服寒食散盛冬卧於石上博涉群書專精釋典普通三年卒梁簡文甚

傷悼焉與劉慧斐書述其貞白云

廬山志

陳

張正見字見頤清河東武城人梁元帝立拜通直散騎
侍郎遷彭澤令屬梁季喪亂避地于匡俗山時焦僧
度擁衆自保遣使請交正見懼之遜辭延納然以禮
法自持僧度亦雅相敬憚高祖受禪詔正見還都除
鎮東鄱陽王府墨曹行叅軍兼衡陽王府長史歷宜
都王限外記室撰史著士帶尋陽郡丞累遷尚書度

支郎通直散騎侍郎著士如故太建中卒時年四十

九有集十四卷

陳書

唐

李白字太白十歲通詩書賀知章稱為謫仙薦於玄宗
召見金鑾論當世事奏誦一篇帝賜食親為調羹命
供奉翰林祿山反轉側宿松匡廬間永王璘辟為府
僚璘起兵逃還彭澤及璘敗當誅因嘗救郭子儀犯
法至是子儀請解官以贖得長流夜郎赦還潯陽復

坐事下獄會宋若思將兵往河南道潯陽釋其囚辟
為叅謀未幾辭職依當塗令李陽水悅謝家青山將
終焉代宗立召為左拾遺已卒年六十餘

唐書宏簡

錄

元結字次山河南人後魏常山王遵十五代孫少不羈
十七乃折節向學天寶十二載舉進士天下兵興入
猗玗洞始稱猗玗子後家瀼濱乃自稱浪士久之拜
道州刺史進授營管經略使加左金吾衛將軍卒年

五十贈禮部侍郎

唐書

李華字遐叔趙州贊皇人天寶十一載遷監察御史安
祿山反主誅守之策皆留不報元宗入蜀百官解竄
華母在鄴欲間行輦母以逃為盜所得偽署鳳閣舍
人賊平貶杭州司戶叅軍華自傷踐危亂不能完節
又不能安親欲終養而母亡遂屏居江南上元中以
左補闕司封員外郎召之華喟然曰烏有隳節危親
欲荷天子寵乎稱疾不拜李峴領選江南表置幕府

卧疾江州其送李侍御序有云方理舟潯陽追跡幽人雖病痼齒衰而神王顛顚之中齊榮辱一視聽是非哀樂無自入矣

豫章書

吳筠字貞節華州華陰人通經義美文辭舉進士不中性高鯁不耐沈浮于時愛廬山之勝卜居於茲著廬山雲液泉賦大歷十三年卒弟子私謚曰宗元先生

同上

侯高字元覽上谷人少為道士學黃老練氣保形之術

居廬山號華陽居士與孟郊東野韓愈退之李勃濬之獨孤朗用晦李翱習之相往來汴州亂兵士殺留後陸長源東取劉逸淮乃作弔汴州文投之大川以訴貞元十五年李翱遇高於蘇州出其辭以示翱翱謂孟東野曰誠之至者必上通上帝聞之劉逸淮其將不久後數月逸淮竟死達撫為楚州起攝盱眙祭酒李公遜刺衢州請治信安其觀察浙東又宰于剡三縣皆有政不幸得心疾留其子狗兒於李翱家而

歸廬山不到卒於江西

文苑英華

楊收字藏之馮翊人讀書廬山有道者謂之曰子貌可
仙如仕即至宰相能捨所事從吾游乎收時方覲進
取謝不能道者遂去不見

國余錄

蕭存字伯誠蕭穎士子仕為金部員外郎以惡裴延齡
棄官歸廬山子東為邕南從事女嫁柳中庸韓文公
愈少時為存所知其後愈自袁州入為祭酒經廬山
過其居存諸子皆凋謝惟女在江州為尼愈題其舊

堂曰中郎有女能傳業伯道無兒可保家偶到匡山

曾住處幾行哀淚落烟霞

廬山紀事

後五代

歐陽敷字華道鄧州南陽人後漢隱帝間為中書舍人
繼秉天雄軍節鉞周太祖時為光祿大夫檢校尚書
侍郎因兵亂避居九華山後又徙隱彭澤筠塘淳化
間卒遂葬于其地子燭登咸平進士歷官常侍以父
墓在縣遂家焉

府志

南唐

孫晟初名鳳又名忌密州人好學有文辭尤長於詩少為道士居廬山簡寂宮常畫唐詩人賈島像置於屋壁朝夕事之簡寂宮道士惡晟以為妖驅出之乃儒服北之趙魏謁唐莊宗於鎮州莊宗以晟為著作佐郎天成中奔吳為吳相後使於周世宗召問江南事不對殺之

豫章書

宋

宋庠字公序安州安陸人後徙開封之雍邱父杞嘗為
九江掾與其妻鍾禱于廬阜鍾夢道士授以書曰以
遺爾子視之小戴禮也已而庠生他日見許真君像
即夢中見者庠天聖初舉進士開封試禮部皆第一
歷官司空謚元獻

豫章書

劉廷式字得之齊州人娶瞽女既喪不復娶蘇軾深重
之後監太平觀遂老於廬山

府志

張所青州人登進士歷官監察御史直言詆黃潜善責

鳳州團練副使江州安置

宋史宏簡錄

柳勅字公渙其先河東人徙居廣信登元符進士任河南叅軍時徽宗惑于靈素誅求百姓勅上疏不報歎曰主上崇虛棄寔宋道去矣吾既不能正君可負所學而羈靡爵祿乎竟解組南旋道經湖口訪陶元亮故址遂卜居焉

府志

王庶字子尚慶陽人以不主和議七疏乞免乃以資政殿學士知潭州歸至九江被命奪職徙家居焉

同上

李若谷河北人高宗時罷叅政或曰胡不效楊原仲之泣若谷笑曰即捶死淚亦不出秦檜聞之大怒謫居

江州

林志

元

黃澤字楚望資州人父儀可累舉不第隨兄驥子官九江蜀亂不能歸因家焉澤生有異質慨然以明經學道為志作易春秋二經解大德中江西行省相臣聞其名授江州景星書院山長懼學者得於創聞不復

致思乃作易學濫觴春秋指要示人以求端用力之方吳澄嘗觀其書以為平生所見明經士未有能及之者

元史

黃德隆山東人江州萬戶管軍尚節概元末城陷與總管李黼同死子孫因世居於高良山

林志

明

趙汭字子常休寧人姿稟卓絕初讀朱子四書多所疑難乃盡取朱子書讀之聞九江黃澤有學行往從之

游澤之學以精思自悟為主其教人引而不發訪一再登門乃得六經疑義千餘條以歸已復往留二歲得口授六十四卦大義與學春秋之要後復從臨川虞集游聞吳澄之學乃築東山精舍讀書著述其中學者稱東山先生

白志

桑喬字子木揚州人為御史嘉靖辛酉謫九江居廬山北林隱菴凡諸名勝無不歷覽所著有廬山紀事

豫

章書

邢懋學黃梅人進士懋敬之弟遷居九江博學高才舉
孝廉不願計偕創長松館延紫栢大師與江中明林
半偈侄士俊等效遠公淨業故事歸宗寺賴以復興
府志

陳昂字爾瞻莆田人隆萬間避倭難攜妻子客南昌旋
愛匡廬旅於九江琵琶亭側以織草履為業得錢輒
沽酒間或為人卜凡匡廬幽險處莫不登覽後卒於
金陵有白雲先生詩集同

王一翥字子雲黃岡人中舉後隱居德化之吳障山茅屋三間蕭條高寄博學逸才詩文皆有天然之趣子材而夭即埋山下倣延陵季子之風人呼為楚狂士同上

南安府

宋

程顥字伯淳頤字正叔河南人父珦宋仁宗慶歷甲申知興國縣事越二年丙戌通判南安軍時周敦頤任

司理叅軍因與為友令二子師事之每令尋孔顥樂處宋史傳稱顥自十五六時與弟頤聞汝南周敦頤論學遂厭科舉之習慨然有志求道顥仕至太子中允監察御史裏行後謫汝州監稅哲宗召為宗正丞未行而卒年五十四文彥博題其墓曰明道先生嘉定間謚曰純公頤官至秘書省校書郎卒年七十五學者稱伊川先生謚曰正公

豫章書

江公望字民表睦州人舉進士建中靖國元年由太常

博士拜左司諫內苑畜珍禽異獸力言非初政所宜
蔡正仙府史以語言疑似成獄公望極言論救出知
淮陽軍未幾召為左司員外郎以直龍圖閣知壽州
蔡京為政編管南安軍遇赦還家建炎中贈右諫議
大夫 宋史

張九成字子韶其先開封人徙居錢塘趙鼎薦為太常
博士改著作郎除宗正少卿權禮部侍郎秦檜主和
議九成上陳十事檜惡其立異謫守邵州檜黨何鑄

劾以傾附趙鼎詹大方復論與僧宗杲謗訕朝政謫
居南安軍十四年益勤問學每執書就明倚立庭甃
歲久雙趺隱然檜死起知温州丐祠歸卒寶慶初贈
太師崇國公謚文忠

宋史宏簡錄

解潛藍田人為邊帥以中丞李文會言其本趙鼎客不
從和議謫居南安凡十九年疾革張九成往視之潛
泣曰生平仗忠義誓與敵死為秦檜所斥此心惟天
知之九成曰無愧此心足矣何必人知即豁然而逝

明一統志

鄭公憶紹興間由資政殿學士謫居南安

府志

劉黻字聲伯温州樂清人淳祐中丁大全劾奏丞相董槐去國將奪其位時黻為太學生伏闕上書忤執政送南安軍安置歸別其母母曰為臣死忠以直被貶分也速行黻至南安盡取濂洛諸書摘其精要語輯成書十卷名曰濂洛論語及大全貶黻還太學累官至試吏部尚書以丁艱歸久不起及文天祥勤王徵

之慨然赴難尋以疾卒始終大節卓然著有蒙川集
問梅集及詩銘若干卷傳於世

同上

明

陳獻章字公甫新會人舉正統十二年鄉試再上禮部
不第從吳與弼講學居半載乃歸廣東布政使彭韶
總督朱英交薦召至京令就試吏部辭疾不赴疏乞
終養授翰林院檢討以歸至南安與知府張弼日相
賡和弼疑其拜官與與弼不同對曰吳先生以布衣

為石亨所薦故不受職獻章以聽選國子生疏陳始
終願仕故不敢偽辭釣虛譽自是屢薦卒不起萬歷
初從祀孔廟追謚文恭

白志

贛州府

唐

張說字道濟洛陽人長安中為鳳閣舍人張易之誣陷
魏元忠援說為助說廷對元忠無不順言忤武后旨
謫嶺南留虔地寓紫極宮撰有碑文

贛府新志

李嶠字巨山贊皇人舉制策甲科封趙國公特進同中書門下三品中宗崩嶠嘗密請相王諸子不宜留京師及元宗嗣位獲其表宮中張說言嶠誠懜逆順然為當時謀吠非其主不可追罪天子亦顧數更赦遂免聽隨子虔州刺史暢之官嶠富才思為文章宿老一時學者取法焉

唐書

宋

包拯字希仁合肥人過虔師事邑人陳晦之於崆峒山

中 贛縣志

蘇洵字明允眉山人嘗南遊入虔與贛人鍾棐交洵不喜飲酒每為設醴其後洵子軾轍過虔必造訪棐又與棐子志仁志行志遠敦通家之好云

府志

呂倚字夢得維揚人少有聲場屋善屬對好收古今帖贈蹬不偶老始以恩補瑞金簿致仕貧無以歸年八十餘唯有一女嫁贛人因居焉與王禹玉有舊元豐間餉錢二萬酒十壺倚作啓致謝隔句中用白水真

人青州從事為對禹玉極歎賞之東坡過虔遺之以

詩 潘子真詩話

楊方字子直長汀人隆興初登第嘗遊崇安謁朱子面
受教旨後除編修官秘書郎時禁偽學坐朱子故罷
僑居贛州閉門讀書自號淡軒嘉定初召起累官直
寶謨閣廣西提刑卒於象州宋時建祠與東坡並祀

今廢

府志

元

滕賓字玉霄睢陽人仁宗英宗間官翰林嘗客遊興國
至治辛酉為監邑忽都必譔拯粥碑記又有題令公
巖十景詩見袁天麒舊志

潞水志林

明

邱濬字仲深瓊山人屢駐鬱孤臺歷游勝境題咏甚多

天啟間賴令邱爾懿即其冢孫

賴縣志

林珽字質賢閩縣諸生少負氣多才略與郭維經萬元

吉楊廷麟楊文薦姚奇孕同死節於賴州城

福建通

志

國朝

吳參字竟魯貴池人父尊周崇禎末武進士遊跡為頭陀或傳其在南嶽參徃省未得見南昌彭士望與尊周有舊參喪偶子正名纔數齡托士望鞠之參變姓名為姬適訪求幾半天下終不得遇乃從士望於寧都躬耕冠石以父出亡終身不再娶有志理學著裏言一編晚之杭越與河渚三君子應嗣寅沈甸華陳

際叔交相與共談學乙卯卒於杭河渚諸子為具舍
殮遂卜葬焉正名廬墓側三年復歸寧都居金精洞
之篁竹峰刻苦篤行以文學為李騰蛟魏禮高坐弟
子年七十餘卒著有廓言吳子七篇原地印浦堂詩

文集

贛州府志

俞塞字吾體歙縣人少讀書講道不應舉鄉邦以學行
宗之崇禎末棄家出遊抵石城住東門城樓戍卒憎
其哦詩聲却之乃僦居山寺董令應譽聞而賓禮之

留之不可餽以金弗受惟詩文往還邑中人士多就教者後入閩海不知所終

石城縣志

鮑夔生字子韶歙縣人父叔裔崇禎末以孝廉令廣之始興遭亂棄官避地贛縣夔生少從父兵間嫻兵畧意氣豪上所論交皆當世知名士縱游吳越燕齊間丁巳從某都督征吉安戊午從尚將軍之孝勦厓石及平閩汀諸賊壘後先以儒服借箸軍門或談言微中脫善類於阨士論歸之卒子孫屬籍於贛

贛州府

志

卷九十六

柴紹炳字虎臣號省軒浙江仁和人少竒敏博學工詩
中年苦心闢閩濂洛之學嘗從父任過寧都與曾燦
魏禧兄弟遊講學易堂以躬行實踐為歸結廬白茅
峯有終焉之志後以父卒官扶櫬歸里

仁和縣志

江西通志卷九十六